



## Extrait de la revue **SingulierS** du 2<sup>ème</sup> trimestre 2013

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

### Rubrique : **Éditorial**

Lès prumîs chî mwès d' l' anêye sront co rède oûtes, èt mès djins, avu l' Muzée dul Parole, dj' ans anondé tchèke mwès, sins manke, ène activité û ène manifèstâcion ! Ça vike, doûwô ç' cômpe la, dins nôns contrêyes ! Mès ruvnans ôs deûs dêrines, lès strimadjes du 2 nûs lîves : lu cé da René Brilamont a Barvê èt l' cé da Jean-Luc Geoffroy a Virton. Dju voyadjans adon d' in costé a l' ônte du nosse province : du l' Ârdène condrûziène al capitale dul Gôme.

An mêy a Barvê, on s' è bin plê ! Dpîs la dêrine guêre, la comune du Dèrbu è toudi pwârté dès djins k' ont ovré pou ku l' walon vike pa t't-avô. Rapinsans-n' a Edouard Seret, in grand prèsidint k' è ranondé la *Fédération culturelle wallonne et gaumaise provinciale* an 1959 ; a Jean-Marie Mottet k' avot pris lu rlê d' asgûr, mès ossi al viye gârde dès scrîjeûs walons : Christophe Théâte (Tohogne), Sidonie Michaux (Warre), Jean Godefroid (Durbuy), Victor Ponsard (Heyd) èt l' Abbé Meurisse (Erezée). Cès scrîjeûs la astint pus vlêtî pwârtés vè la powézîe, lès monologues û dès bokèts du djoûr. Avu René Brialmont, ki s' è dabôrd fwêt couniche come èn-ome du tàyâte, dj' avans in scrîjeûs tout-oûte, ki nous livre ènut', in fwârt bon ptit roman istorike d' avinture, stampé an 1830, avu dès djins dès campagnes dès bwârd du l' Oûte, mès ossi dès batlîs, dès mineûs... Proficiat mwint' côps a René.

Lu 22 d' jwin, dju strim'rans in roman an gômès, scrît ossi pa in scrîjeûs tout-oûte, mî counu pou sès ûves an francès : Jean-Luc Geoffroy. Ça fwêt lontins k' la Gôme n' è pus oyu l' plêji d' raviké dins in roman mou bin scrît, ki prinrè ène bone place dins la littérature gômèsse. Cès dêrines anêyes, trwâs diccionêres avint vèyu l' djoûr, grâce a Georges Themelin, Alex Michel èt l' *Académie des patois gaumais* ; lès dêrins scrîjeûs, k' avint fwêt parète dès rkeûys du tèkses, su loumint Paul Leroy (Chiny) èt Georges Themelin (Dampicourt). Adon, mwint' cômpe alaboneûre a Jean-Luc Geoffroy, ku sapinse, tourtous s' raffyrè d' lire èt ku dj' lî souwêtans brâmint d' succès.

**Pierre OTJACQUES**